

CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
DEC 7 1940

9299 / 4884

3



古今原始第七卷上

哈佛大學漢和  
圖書館珍藏印

○漢太祖高皇帝

桐城趙鈇鼎卿著

更王后曰皇后王太子曰皇太子尊母曰昭靈  
夫人

按即位后子皆加皇號自此始今母止尊以  
夫人父仍稱太公何也

張良至褒中說漢王燒絕棧道

棧即閣也即今之閣道



入關問秦上帝祠何帝也曰四帝有青白黃赤  
帝之祠高祖曰吾聞天有五帝乃立黑帝祠命  
曰北時

祠五帝始此

畝蕭何收巴蜀租給軍食

收田租始見于此

漢王屯滎陽築甬道屬河以取敖倉粟

甬道始于漢

初為筭賦

古之治民者有田則有稅有身則有役蓋稅  
出財役出力漢始立筭賦之法民年十五而  
筭出口賦夫以一人之身既役其力又稅其  
財苟給一時之用遂貽無窮之害矣

封項籍族屬四人為列侯賜姓劉氏

按賜國姓始此漢既賜項又賜婁敬後世又  
賜匈奴而劉淵者既冒其姓又并天下而冒  
之

詔為列侯食邑者賜大第室吏二千石受小第



宰

孟康曰有甲乙次第故曰第後稱甲第始此  
燕王臧荼反帝自將擊虜之

書人君自將始此

命天下縣邑城

按郡邑立城自漢始

剖符封功臣曹參等為通侯又與功臣作誓丹  
書鐵契金匱石室藏之宗廟

按賜券始此古者爵有公侯伯子男五等既

列爵必分土使君之自秦漢以來始封以郡  
邑之名惟奉朝請而無國漢爵止於侯而無  
公伯子男此又與古異者也

分封宗室為王

古封為諸侯今封為王後因之

尊父太公為太上皇

秦以追尊今則用之於生存之日後世遂祖  
之以為極尊之稱也

未央宮成高祖大朝諸侯群臣置酒未央殿前



奉玉卮起為太上皇壽

上壽始見於此詩曰為此春酒以介眉壽或古有之

以陳平為護軍中尉統諸將

護軍始此

漢置州之佐吏有別駕治中主簿功曹書佐簿曹史典等官皆州自辟除通為百石

按別駕治中主簿功曹書佐史典皆起於漢徵魯諸生起朝儀博士叔孫通采古禮雜秦儀

上之

按朝儀更定於此

制王侯及郡守長吏于所部其指令皆稱教

稱教始此

制禮儀有章表奏駁四品

此漢制也

冬十月朔行朝歲首禮

此後世元旦朝賀之始

是日行朝賀禮畢置法酒群臣侍坐殿上以尊



單次起上壽觴九行御史執法舉不如儀者

按此後世錫宴之始行有制

命蕭何次律令

此後世律令之始

帝召田橫至尸鄉自刎奉首從者挽至宮不敢  
哭故爲歌以寄哀音

按此挽歌之始也或曰其來久矣昔魯哀公  
會吳伐齊其將公孫更命歌虞殯以示必死  
或非始于田橫今不可考

太子門大夫庶子洗馬皆屬二傅太子家令丞  
率更令丞僕中盾衛率等官並屬詹事

太子宫僚至漢初備

定命令稱勅

曰戒勅令勅是也至唐顯慶中云不經鳳閣  
鸞臺不得稱勅勅名遂定後因之

漢儀宮城門擊刀斗周廬擊木柝

刀斗自漢始用

皇女封縣公主儀服同列侯其尊崇者號長公



主儀服同藩王女曰公主姊妹曰長公主

縣公主長公主始于漢

詔讞疑獄

書讞獄始此

冬始與匈奴結和親以長公主妻單于

此和親之始嗚呼齊景公一諸侯也畏夫之強不得已而以女女吳猶涕泣遣之今以中朝之尊四海之大土宇之廣甲兵之強人士之衆廼與典類通婚華夷之防決矣是豈不

得已而為之者哉此高帝因劉敬之言劉敬本魏絳之說乃以是為馭戎上策而後世方且祖之蓋其慕割愛為民之名而不明華夷之分人倫之理故也

令縣常以春三月及時臘祠社稷以羊豕

郡縣祭社稷始此

令郡國縣立靈星祠

龍星左角曰天田則農祥也晨見而祭靈星祠始此



令民里社各自以財祠

里社始此

以叔孫通爲太子太傅

太子有師保二傅殷周已有之恐不以太子爲名至此始以名官後曰之又有太師太保之稱

輿駕有象車鼓吹十三人中道

象車漢鹵簿最在前者

賜蕭相贊拜不名履劍上殿

書贊拜不名履劍上殿始此

置大長秋中長秋諸宦官屬焉

長秋之名所由起也

徙齊諸田楚昭屈景燕趙韓魏後及豪傑名家居關中

徙民實京師始此

有更賦

更賦有三品有卒更有踐更有過更或云因秦法行之後遂改易有謫乃戍邊一歲耳



詔郡國求遺賢

此古今第一詔也旨哉

太上皇崩令諸侯王國皆立廟

按立廟郡國自此始

朝以十月車服黃屋左纛

黃屋左纛始于漢

樂布為燕相燕齊間為立社號曰樂公社

配食縣社始此

復沛民

帝自將破英布還至沛謂沛父兄曰遊子悲  
故鄉吾雖都關中千秋萬歲後吾鬼鬼猶思  
沛且朕自沛公以誅暴逆遂有天下其以沛  
為朕湯沐邑復其民世世無有所與後世創  
業之君復其鄉邑者蓋本乎此

以周昌為趙王如意相

為諸侯主立相始此

帝以太牢祠孔子于曲阜

萬世祀先師之始



五月葬長陵

稱陵始此

漢以來帝王陵寢有石麟辟邪兕虎之屬人臣墓有石人羊虎柱之屬皆表墳壠如生前儀衛用石人羊虎疑起于漢

○孝惠帝

尊皇后曰皇太后

書尊母為太后始此

令民買爵贖罪

書贖罪始此按舜典金作贖刑非利之也惠帝令民有罪得買爵三十級以免死罪則是富者有罪非徒免死又因而得爵嗚呼賞罰濫矣

賜民爵戶一級

普賜天下民爵始于此自後凡初改元率以為例

令女子年十五以上至三十不嫁五筭

漢筭人百二十錢賈與奴婢倍筭今五筭罪



之也

舉孝弟力田

孝弟力田上之人特設科以誘之世道可知  
已此一變端也

除挾書律

至是而書始出矣幸哉

立原廟

按原者再也先既立廟今又再立故以原名  
先王之祀有時享有禘祫奉之有常立原廟

襲矣

春出遊離宮叔孫生曰可取櫻桃獻宗廟上許  
之

廟中獻諸果自此始

冬十月始置左右丞相以王陵為右丞相陳平  
為左丞相

名始於商書而與丞並稱未有也

以周勃為太尉

太尉之名始此



太后呂氏立所名帝子爲皇帝

此後世立假子之始

太后呂氏自臨朝稱制

此母氏臨朝之始古今一大變也曰不幸子  
幼則如之何曰有制焉君薨百官總已以聽  
於冢宰

太后追尊其父爲宣王兄澤爲悼武王

嗚呼此漢以來尊崇外戚之始

太后以嬖臣審食其爲左丞相監宮中

嗚呼此寵任嬖倖之始

魯元公主薨賜謚爲魯元太后

公主謚太后始見于此

立公主子張偃爲魯王

公主子封王始見于此

以宦者張卿爲大謁者受宣詔命

用宦官之始

初令戌卒歲更

按戌卒歲更自此始



○漢文帝

太尉勃上天子璽代王謝曰至代邸議之

諸侯王邸始見于漢

賜民酺

酺祭名周禮族長因祭酺而與長幼獻酬故  
為酺古有酒禁漢法三人無故群飲酒罰金  
四兩文帝即位首賜天下會聚飲食凡五日  
意在悅民也後因之

立先馬秩六百石職如謁者太子當直前導

先或作洗洗馬始於漢

命四方毋來獻

書卻貢獻始此

脩代來功封宋昌為壯武侯

此藩王入繼封其臣僚之始

十一月晦日有食之詔求言

此因災異求言之始

舉賢良方正能直言極諫者

後世策士求言之始也



吳王濞為劉氏祭酒

始有祭酒之名至晉始置國子祭酒

潁陰侯騎賈山應詔上書

此應詔上書之始

詔勸農

後世勸農始此

賜天下今年田租之半

賜民租始此

令列侯太夫人毋得擅徽稱

如淳云列侯子復為列侯毋稱太夫人漢制

也今夫不在則封號稱太

濟北王興居反尋自殺

藩王反始此

募民徙塞下

此募民徙邊之始

除盜鑄錢令使得自鑄

後世弛私錢禁始此唐玄宗欲倣而行之劉

秩言其不可利源無制則爭且亂矣



律吏五日一休沐

休沐始於漢

出宮人令嫁

此放官人之始

錯為太子家令

家令漢官或云秦官屬詹事

冬十二月河決酸棗始興卒塞河

河始為世大患

除肉刑

三代以前所謂肉刑者墨劓剕宮大辟五者  
至漢時僅有三焉黥劓斬趾而已文帝感淳  
于公少女緹縈之言始下詔除之遂以髡鉗  
代黥笞三百代劓笞五百代斬趾自是天下  
犯法者始免斷肢體刻肌膚之慘矣  
令祝致敬母有所祈

秦時有祕祝移過于下文帝禁之自後不祈

始此

冬匈奴寇邊帝親勞軍勒兵



此後世人君親勞軍之始

募民能輸粟及轉粟於邊者拜爵

輸邊之議始此

始用薄昭為車騎將軍

車騎將軍之名起于文帝

始親策賢良文學士

此後世人主親策士之始

作顧成廟

身存而自為廟也顧成者取尚書顧命之意

詔更元

人君即位之一年是謂之元元者首也始也

國無二主故年無二元自三代以來未之改

也文帝信新垣平候日再中之說於是乎詔

以十七年為元年是失春秋正始之意矣後

世有一君而二元三元者有之甚乃至於六

七元焉此一妄端也

命博士諸士刺六經作王制

始崇六經



始短喪

三年之喪自天子達於庶人三代共之文帝以一已之見輕變先王之制景帝苟徇亂命變為以日易月後因踵以為常雖有賢孝之君痛欲復古然旋復旋廢至今未能如禮嗚呼文帝作之景帝述之其罪均矣

○漢景帝

尊皇太后薄氏曰太皇太后

此稱太皇太后之始

冬十月尊高皇帝為太祖孝文皇帝為太宗

追尊祖宗廟號始見于此一世為太祖再世為太宗遂為後世法

始三十稅一

寬賦至此極矣恐非法也

令男子二十始傅

按傳著也言著名籍以給公家徭役也漢制民年二十二始傅五十六乃免今制令二十始傅



原姓 第七卷  
置太農令掌穀貨

即秦理粟內史之職也武帝更名曰大司農

作陽陵邑

此後世豫作壽陵之始

封匈奴降者徐盧等為列侯

後世封降胡為侯始此文帝時雖有弓高襄

城兩侯乃韓王信子孫非匈奴也

改礫為弃市

弃市始此

楚王卬等重逆無道燒宗廟帝素服避正殿

避殿始于此

夏旱禁酤酒

漢興有酒酤禁三人以上無故群飲罰金四

兩雖非古法然猶有周官萍氏所掌幾酒之

餘意文帝禁民毋為酒醪以靡穀景帝因是

又禁無所利之至武帝時為榷酤之法始用

是以罔利矣此亦挾荒之一端也

脩賣爵令得輸粟縣官除罪及徒復作



贖徒始此

匈奴入雁門武泉上郡取苑馬

漢太僕牧師諸苑三十六所分布北邊西邊以郎為苑監官奴婢三萬人養馬三十萬匹按苑馬始于漢

更減管法定箠令

帝初減管法然其數猶多或管未畢而人已死矣至是又下詔減三百為二百二百為一百因是定箠令箠長五尺其本大一寸竹也

末薄半寸皆平其節當管者管臀毋得更人一罪乃更也自是管者得全云

更衛尉為中大夫

按衛尉秦官也漢因之今始更名

改奉常為太常

太常官名始此

更名郡守為太守

稱太守始此

改廷尉為大理



大理名官始此後或稱廷尉或稱大理至梁  
加卿字曰廷尉卿

○孝武皇帝

建元元年

年之有號起于此

以竇嬰為丞相

後世寵任母黨此為之兆

以後宮夫人異父弟衛青為太中大夫

此私任後宮親屬之始

親策董仲舒凡三問

臨軒策士始此

帝始為微行

微行始此

始置五經博士

置五經博士始見于此嗚呼五經自秦火之  
後為世大禁漢興稍復出然皆私相傳習至  
是官始置五經博士然後天下之人公相授  
受以為世業武帝有功儒教豈小小哉



爲博士官置弟子五十人復其身

此太學生入仕之始自武帝立五經博士弟子置員設科射策訖于元始百有餘年業者盛一經說至百萬餘言大師衆至千餘人盖利祿之路始開也

南越遣子嬰齊入宿衛

此外夷遣子入衛之始

初令郡國舉孝廉秀才

孝廉秀才起於漢

定三歲一郊

三歲一郊始此

始親祀竈

禮竈者老婦之祀也今天子親之矣

始用霍去病爲驃騎將軍令秩祿與大將軍等

驃騎將軍起於武帝

立太乙祠

自是五帝之上復有太乙尊神舍園丘之位而開八通之鬼道舍冬至之月而用春秋之



二時果何所據耶然祀以昏時及明而止至今正月望日夜遊觀燈是其遺事

河徙頓丘始通淮泗

河水入泗由泗入淮始此

以衛長公主妻爰大曰大主將相以下皆遺獻之

此武帝姑也大主之號始此

通西南夷置犍爲郡

始闢地於西南

武帝登高聞山呼萬歲者三遂爲臣祝君故事

山呼白此始

虞初撰周說九百四十三篇

小說家始於虞初

初筭商車

古人關市征歛惡其逐末專利而抑之初非利其貨也武帝始筭商車而取賈人之緡錢非但稅其物乃計其載物之器而稅之矣帝以象牙簞賜李夫人



帝牙之用至是益褻矣

帝寵竇太主所私董偃稱曰主人翁後卒與太主會葬於霸陵

公主貴人多踰禮制自董偃始

元朔元年

三改年號始此

始置蒼海郡

始闢地於東夷

李夫人之亡少翁言能致其魂上念夫人無已

使致之少翁夜為方帷張燈燭帝坐它帳自帷中望見之彷彿夫人也

此後留寬之所自也

徵吏民明世務習先聖之術者縣次續食

後舉子傳食之始

鄭當時請引渭穿渠徑易漕度渠下民田可溉兼損漕省卒

始講漕法

臨菑人主父偃嚴安無終人徐樂皆以上書拜



為郎中

後上書人得官始此

始立朔方郡募民徙之

始闢地於河朔

以公孫弘為丞相封平津侯

丞相封侯自弘始

元狩元年

四改年號始此

遣謁者巡行天下

後世遣使巡行之始

遣張騫使西域

遣使通西域之始

立樂府

按樂府始此

作昆明池

漢水戢始此

通滇國

此雲南通中國之始



初置八校尉

始稱校尉

匈奴渾邪王降置五屬國以處其衆

此胡酋來降之始嗚呼決內外之防混華夷之俗魏晉以來夷狄亂華其幾實肇於此

始造皮幣

按武帝時錢濫而物貴遠方用幣煩費不省有司議以白鹿皮方尺緣以藻績爲皮幣直四十萬王侯宗室朝覲聘享必以皮幣薦璧

然後得行此蓋用皮爲幣雖與楮鈔不同然不用金銀銅錫爲幣而用他物代之則權輿于此也

武帝之文始以集著

文集起於漢武帝今田父野老亦皆有集

始置鹽鐵官

後之有天下者鹽鐵置官始於武帝

初筭緡錢

此漢以來征權居貨之始按武帝於元光五



年既筭其行者之車至是又周公卿言凡居貨者各隱度其財物之多少於商賈末作率計有緡錢二千者出一筭於手力所作而賣者率計有緡錢四千者出一筭嗚呼出諸途者既征其齎載之具藏諸家者又筭其儲積之物取利至此哉

置婕妤視上卿比列侯

始有婕妤之號

河南人卜式請輸錢縣官以助邊上賢之拜式

為郎中又擢為齊大傅以風百姓

按小民輸粟得官始此

募人入奴婢終身以為郎

此以奴婢易官之始也

筭民舟車

元光五年止筭商車至是又併筭民車且及船焉凡民不為吏不為三老騎士苟有輕車皆出一筭商賈則倍之船五丈以上出一筭匿而能告者以半昇之遂使告緡者遍天下



則凡民有蓄積者皆為有司所隱度矣嗚呼  
取民至此民何以為生乎  
以下式為中郎賜爵左庶長  
書賜爵始此然所賜者庶長也至宣帝以後  
則所賜者皆侯矣

策  
廟立子閔為齊王旦為燕王胥為廣陵王作誥

此用策封之始也書廟立亦前所未見

丘仲造笛長尺四寸七孔

笛出於孝武時

下大農令顏異于獄論以腹誹罪殺之

腹誹之誅古所無也

元鼎元年

五改年號始此

始置大司馬以冠將軍之號寵衛青霍去病

古司馬夏官也今武帝立此以寵武臣之執

國柄者宰相之權因此廢矣

西域始通中國



此西域通中國之始

置水衡都尉掌上林苑

上林苑起於漢後因之

始禁郡國鑄錢

至是官鑄錢

更大行人為大鴻臚

周禮大行人掌賓客及諸侯朝覲事即其任

也秦初置典客漢因之景帝名大行人武帝

改之至梁則曰鴻臚卿後因之

秋九月嘗酎列侯百有六人坐獻助祭金不如  
令奪爵

酎金奪爵罪輕而法重非為金也以封爵過  
多故耳

置酒泉武威郡

按酒泉今肅州武威今涼州也二郡乃渾邪

王故地

封周後姬嘉為周子南君

錄前代後始見于此



更郎中令名曰光祿勳

光祿勳官名始此至梁除勳字加卿字曰光祿卿後因之北齊兼掌肴膳隋則全掌肴膳不復掌宮殿門戶及侍衛事矣

光祿勳有南北司主事諸郎之中察茂才高第者爲之

主事官名始於漢

平西南夷置牂牁越雋沈黎文山武都郡

此西南夷置郡之始

置張掖燉煌郡

按張掖燉煌立郡始此

元封元年

按六改年號始此

始置均輸平準

先是桑弘羊爲治粟都尉領大農盡管天下益鐵乃置大農部丞數十人分主郡國令遠方各以其物如異時商賈所轉販者爲賦而相灌輸置平準于京師都受天下委輸貴即



賣之賤即買之欲使富商大賈無所牟大利而萬物不得騰踊嗚呼堂堂天朝乃與商賈競刀錐之利乎

築單于邸于長安單于遣子來質

始有蠻夷邸即後之四夷館也

公孫卿言仙人好樓居乃令長安中作蜚廉柱觀甘泉作益壽延壽

樓觀始盛於此

築受降城

史凡數見此其一也

甘泉房中產芝

書芝始此

遣將擊朝鮮

書征高麗始此

輿駕祀甘泉汾陰畢竿左右及節十六後有御

馬三

按儀馬之設自漢始見

大宛以蒲陶為酒馬嗜苜蓿漢使取其實來天



子始種苜蓿蒲陶肥饒地

蒲陶苜蓿始至中國

初通安息發使隨漢使來觀漢廣大以大鳥卵  
及黎軒善眩人獻于漢

眩人善變幻惑人即今之吞火吞刀植瓜種  
樹屠人截馬自縛自解之術也眩戲始於此

起建章左鳳闕

始有鳳闕之稱

始置益州郡

此郡縣雲南之始

改秦中尉更名曰執金吾

金吾之名始於此

初作角觝戲魚龍曼延之屬

此後世戲樂之始

始制樂浪臨屯玄菟真蕃郡

此郡縣高句麗之始按文帝時陳武等議伐

朝鮮謂南越朝鮮自全秦時內屬為臣子則

朝鮮在秦時固已屬中國矣漢初方擁兵阻



險自國其地至是武帝因其殺遼東都尉遣  
荀爽楊僕等討之朝鮮人殺其王右渠以降  
始置此四郡

初置刺史

冀幽并兖徐青揚荆豫益涼州及朔方交趾  
凡十三郡後世監司之設肇端于此

太初元年

七改年號矣

漢異姓婦人以恩澤封者曰君比長公主

婦人始有封君之號

初置京兆尹

京兆尹官名始此即周之內史也

尊王太后母臧兒爲平原郡君

此封郡君之始

又封太后徵時金王孫家所生姊號修成縣君

此封縣君之始

爲太子立博望苑使通賓客

此太子賓客所由始也



始用宦者主中書

用宦者典事始此中書之名因武帝遊宴後  
庭始以宦者典書尚書謂之中書首以司馬  
遷爲之此即周官內史之任也

天漢元年

按年號已八改矣

初榷酒酤

古有禁恐民之沉酗喪德糜穀耳無所利之  
也武帝始爲征榷之禁謂之榷者禁民酤釀

官自開置獨專其利如渡水之榷焉是古人  
之禁酒惟恐民之飲後之禁酒惟恐民之不  
飲也爲法之弊一至此哉

作流命法

捕盜也曰盜起不發覺發覺而捕不滿品者  
主者皆死至是上下相匿以文辭避法矣

太始元年

九改元矣

始令列侯之妻稱夫人列侯死子復爲列侯乃



稱太夫人子不得爲列侯則不得稱

始有夫人太夫人之稱

行幸甘泉宮饗外國客

宴外國使臣始於此

征和元年

十改年號

令封君以下至三百石以上吏以差出牝馬天

下亭亭有畜特馬歲課息

始有種馬

詔行代田以趙過爲搜粟校尉

代田之名始見於此

莊熊羆引洛水至商顏下岸善崩乃鑿井井下  
相通行水

井渠之生自此始

以江充爲使治巫蠱獄

巫蠱之名始見於此

後元元年

至是十一改矣古今罕見



○孝昭皇帝

追尊李夫人為孝武皇后

此後世尊夫人為皇后之始

追尊帝生母趙氏為皇太后

追尊生母為皇后始此

遣使祀鳳凰

書祀鳳凰始此

遣使賑貸貧民種食

賜種食始此

封后父上官安為桑樂侯

后父封侯起于此

罷榷酤官猶令民自占租

前榷酤官自釀以賣也至是以賢良文學言

罷榷酤官猶聽民自釀而賣官定其價每升

四錢隱度其所賣之多寡以定其稅此即胡

寅所謂使民自為之而量取其利也邪後世

稅民酒始於此

初置金城郡



今河蘭等八州之地

徵有行義者韓福等至長安

書徵士始此

霍光廢其君歸昌邑

此後世人臣廢立之始嗚呼國家之事孰有大於立君也哉人臣之罪孰有大於廢君也哉霍光此舉以一時利害論之雖若忠於漢室以萬世綱常論之實得罪於名教原其所失不在於廢之之時而在於立之之始也人

臣舉事稍不詳審卒爲亂階霍光不得辭其責矣然則伊尹放大甲非歟曰孟子有言有伊尹之志則可無伊尹之志則篡也可者僅可而有所未盡之辭

○孝宣皇帝

追謚帝太父故太子據曰戾太子大母曰戾夫人父曰悼考母曰悼后置園邑

後世自外入繼正統追謚其本生祖父母父母始此



遣使問吏民

遣使問吏民僅見於此

大司馬大將軍博陸侯霍光卒賜以天子葬具

賜大臣以非所當用之禮始此亦名器之不

慎也

帝始五日一聽事

漢朝無定日又不日日臨朝至此始五日一

聽事

耿壽昌白增海租

後魚課始此蕭望之言縣官常自漁海魚  
出後與民魚乃出天地之意可見矣

丞相常賢致仕

丞相致仕自賢始

齋居決事

稱齋居始見於此

賜外祖母號為博平君

推恩外祖母始此

詔自今子匿父母妻匿夫孫匿大父皆勿治



律有所謂親屬相為容隱者本諸此  
帝更名詢

天子更名之始也

張賀為掖庭令宣帝以皇曾孫收養掖庭恩甚  
密及即位追封恩德侯

此追錄掖庭舊恩之始也

追尊悼考為皇考立寢廟

後世外藩入繼正統為其本生父母立廟始  
此

衛侯馮奉世矯發諸國兵破莎車

矯制發兵始此

錄阿保功封丙吉等為列侯

錄養保功始見于此

求高祖功臣子孫失侯者復其家

書錄功臣後始此

蕭望之以射策甲科為郎

自是有甲乙科

丙吉居相位掾史有罪臧不稱職終無所案驗



後人代吉因以為故事

公府不察吏自丙吉始

詔王褒等之太子宮侍太子朝夕誦讀

按宮僚始於此

西羌反募飲飛射士魯竒應募宜受上賞

召募之始

初置屯衛

屯衛之立起于此

遣後將軍趙充國擊先零叛羌屯田湟中

書屯田始此

年八十以上非誣告殺傷人勿坐

年老收贖義起于此

春二月甘露降京師

書甘露始此

遣光祿大夫義渠安國行邊兵

後遣大臣行邊皆原于此

諫大夫王吉謝病歸

人臣託病去位始見于此



以宦者弘恭為中書令石顯為僕射

宦者之設三代以前本以給役武帝遊宴後庭始命以典事然所用者乃腐刑之司馬遷彼固知道義識古今者也然遷不世有後世遂襲以為故事以國家樞機之重委任昵近其不至蔽聰明竊威柄也幾希先儒謂宣帝開三大釁終以亡國用恭顯其一也愚竊以為宣帝非但用之以亡漢後世因之以亡其國者寔帝為之

鄭吉破車師降日逐威震西域遂并護車師以西北道故號都護

都護之置自吉始

冠太子以正月冠諸王遣使行事

太子行冠禮始見于此

置金城屬國以處降羗

立屬國始見于此

司隸校尉盖寬饒奏封事犯時忌被殺

以犯忌殺言者又開一釁也



地震詔舉郡國文學高第各一人

因災異舉士之始

以故許后季父延壽為大司馬車騎將軍

自是以後將軍司馬之任專以任外戚終漢之世

匈奴呼韓邪單于稱臣遣弟入侍

北狄稱臣入侍始見于此

戴德以朋友有同道之恩加麻三月

朋友之服始於大戴

初置常平倉賜耿壽昌爵關內侯

築倉儲穀始此

畫功臣十一人於麒麟閣

後世圖功臣像始此

詔諸儒講五經同異於石渠閣帝稱制臨決

書講經始此

于定國決獄平郡中為之立生祠號曰于公祠

生祠始見于此此民所自立者後違道要之

甚有在位而自立者可笑也已



帝召太子至遲問故曰太子出龍樓門不敢絕  
馳道西至城門得絕廼度因著令太子得絕馳  
道

太子得絕馳道始於此

○孝元帝

作初陵不置邑徙民

此可為萬世法也

帝玄成議毀主瘞於園

魏議應埋太廟兩階間後議祧主藏於石室

神洽廼祭

貢禹議古無口錢起武帝征四夷重賦於民產  
子三歲則出口錢故民重困至於生子輕殺甚  
可悲痛宜令男七歲去齒乃出口錢年二十乃  
算天子行其議

產子七歲廼出口錢自此始

○孝成帝

帝專委任王鳳策免大司馬車騎將軍許嘉

此策免大臣之始



置尚書員五人

自武帝用司馬遷為中書令宣帝因以授恭顯國家樞機遂屬之宦官元帝時蕭望之言武帝始用宦者非古制宜更用士人元帝不聽至是王鳳欲專內外之政始罷中書謁者奪其所掌尚書之事而增置尚書員始以士人為之按尚書之名起於秦武帝初置四人至是成帝增一人為五五人者常侍曹二千石曹民曹主客曹三公曹也後世尚書分曹

始於此

帝玄成佯狂讓封其兄

讓廕始見於此

令郡二千石賜告不得歸家

漢律二千石有賜告有予告予告者法所當得賜告者病三月當免天子優賜其告使得印授官屬歸家理疾今郡二千石賜告不得歸家自馮野王始也

詔光祿大夫劉向校中秘書



命儒臣校書始見於此

遣使求遺書

自秦人焚書之後書籍散亡多矣漢興始收之開獻書路置寫書官設藏書府稍稍復集今又譴謂者陳農求遺書於天下美哉

班斡為右曹中郎將與劉向校秘書每進讀辭書上器其能賜以秘書之副

此賜書所由始

定陶王康來朝遣還國

人君未有繼嗣留親王之繼次者奉藩京師以待皇嗣之生然後遣之國此萬世根本之慮今遣王之國奸臣之計也

封婕妤趙氏父臨為成陽侯

婕妤父封侯前此未有也自茲始

立從子定陶王欣為皇太子

書立兄弟之子為嗣始此

以太司馬太司空並丞相為三公

按三公之官虞夏商已有之漢因秦以丞相



御史大夫太尉為三公至是改御史大夫為  
太司空並太司馬丞相為三公哀帝時又罷  
丞相置太司徒並太司馬太司空為三公鳴  
呼太尉兵官也御史大夫法官也司徒司馬  
司空六卿也乃以當論道經邦燮理陰陽之  
任名不正矣

罷刺史置州牧

此州牧所由始也

師丹上書請限民名田

始有限田之議此善政也惜不果行

於大行前拜孔光為丞相

樞前拜相始此

令博士弟子父母死予寧三年

後世士子丁父母憂始此

○孝哀皇帝

皇太后傅氏崩合葬於孝元陵

此後世以妾母合葬大君之始

漢成都侯王商以特進領城門兵置幕府得舉



吏如將軍

特進起於漢位在三公下

下司隸鮑宣獄抵以罪太學諸生守闕上書救之

此後世太學生上書之始

博士弟子秦惠始傳浮屠經

此佛書入中國之始

李尋有五經六緯之言

識緯起于哀平之世

○孝平皇帝

春正月復南北郊始定合祀天地配以高祖高后

嗚呼祀天而配以祖考禮也莽欲誦元后而並以高后配享后可誦也上帝其可誦乎其失禮甚矣後女后有親祀南郊者皆萌于此蓋以可合祀則亦可以祀矣

劉歆移太常孔稚圭因有北山移文

後世文移始於此



始追謚孔子為褒成宣尼公

謚先師始於此

莽以崔篆母師氏通經學有家之言賜號義成夫人

夫人封號始於莽

莽諷吏民上書頌德前後四十八萬七千餘人莽自加九錫

此後世權臣受九錫之始按韓詩外傳曰諸侯有德天子一錫車馬再錫衣服三錫虎賁

四錫樂器五錫納陛六錫朱戶七錫弓矢八

錫鈇鉞九錫秬鬯

莽發故太后傅丁二塚取其璽綬

後世官府發人塚始此

謝靈運承莽意義丹書有文曰告安漢公莽為皇帝

符命之說始於此

郡國縣鄉皆置學官

學官之設始於此



起辟雍靈臺

始建辟雍

古今原始第七卷下

古今原始第七卷下

桐城趙鈇鼎卿著

○世祖光武皇帝

以識用王梁為太司空

人君以識用人僅見於此

安定人盧芳詐稱漢宗室匈奴迎立以為漢帝

北狄立中國人為君始見於此

初起太學

武帝時雖置博士弟子而史不明言其為太



學後世立太學其名始見於此

### 帝視太學

此後世人君視學之始

立親廟洛陽祀父南頓君以上至春陵節侯五  
官中郎將張純太僕朱浮議除之

四親廟始此

徵處士嚴光至京師帝臨所館視之

按親臨處士僅見於此

詔許盜相斬除罪

後世著為令而自首者且貸焉

### 太子疆廢為東海王

後以母廢太子始此

### 征伐四方置督軍御史

御史監軍起於此

### 改常侍曹為吏部曹主選舉

是謂吏部尚書之始

### 南郡獻銅鼓有銘

銅鼓文三就越



鮮卑寇遼東

鮮卑始見於此

夏四月改元

前此改號俱在歲首歲中改者始此

賜莎車王賢西域都護印綬

賜外國印始此

九真徼外蠻夷張游率種人內屬

九真內屬之始

交趾牧率七郡太守遣使奉貢

交趾入貢之始

賜莎車王謚

崇夷有謚始於此

東夷倭奴國入貢

此倭奴貢中國之始

宣布圖讖于天下

書圖讖始此

○顯宗孝明皇帝

春正月帝朝原陵



此後世上陵之始

臨辟廳行大射禮

後世行大射禮始見於此

令郡國行鄉飲酒禮於學

天下郡國行鄉飲於學始此

呈太后陰氏崩上其謚曰光烈

后有謚始於此婦人從夫禮也今日光仍用

帝謚後世用四字二字始去其主之謚而專

稱之失亦甚矣

召張酺數侍講於御前

始有侍講而未嘗名官

遣使者以中牢祠蕭何霍光

人君遣使祠其故臣始見於此

帝奉皇太后如章陵

後世帝王奉太后出幸始見此

荊州刺史郭賀有殊政賜以三公服

後世旌部使者善政始見於此

西域浮屠法始入中國



此佛法入中國之始

西域十二月三十日是中國正月望日謂之大神變帝令燒燭表佛法大明

此放燈之始也亦云漢武祭五時通夜設燎永平摩騰首譯四十二章經

後魏晉南北朝宋皆有翻經館實始於漢

鷄林子曰吾嘗謂三代以上一宇宙也三代以下又一宇宙也秦寔間之今則自明帝以下又一宇宙矣何也夫人必有偶自

是中國始有無偶者首必有髮自是中國始有髡髮者人必有家自是中國始有出家者家必有業自是中國始有不業者書必同文自是中國始有異言者有父則有子至是有不父之子有君則有臣至是有不君之臣教至孔子而止至是有可並孔子之教者尊至上帝而止至是有大於上帝之神者紺殿銖衣徧滿宇宙豈非又一大變哉今之儒者廼陰尊其教陽覆其



名則尤為可歎實明帝首亂之也

詔司隸刺史歲考所部長吏殿最

此後世部使者考察屬官之始

至魯幸孔子宅

幸孔宅見於此

幸洛陽獄理出囚千餘人

幸獄僅見於此

時反支日不受章奏帝敬馬曰民廢農桑遠近

關拘以禁忌豈為政之意

反支日不受章奏漢忌也

匈奴遣子入學

外夷遣子入學始見於此

北單于求合市許之

書合市始此合市交通異其不復入寇非安

攘至計也

幸南陽召校官弟子作雅樂奏鹿鳴帝自御塤

箎和之以娛嘉賓

書歌鹿鳴始見于此



始置中官員數中常侍四人小黄門十人

用宦者有員數始此其數止於十四人後有職名者數千焉可慨也夫

哀牢夷內附

今金齒地也

修沐渠隄

書修隄始此

帝謙貶自抑不立寢廟藏主于光烈皇后更衣別室

不立寢廟自明帝始也

○孝董帝

今班固賈逵傅毅作連珠

始受詔作連珠楊雄亦有連珠或不始於此

章帝東巡守使使者奉一太牢祠帝堯於濟陰

祀先代帝王始此

大學生孔僖上書自訟以為蘭臺令史

大學生因言事得用始見於此

臨鄭均宅賜均以尚書祿



幸大臣家始此

詔定律毋以十一月十二月報囚

冬至後不決囚始此

漢興有草書不知作者姓名至章帝時有杜伯度崔瑗崔寔皆稱工

自蒼頡科斗一變為史籀大篆再變為李斯小篆四變為程邈隸書至草書為五變矣

○孝和皇帝

宦者鄭眾與誅竇憲謀以為大長秋

此東漢宦者預政之始

始封宦者鄭眾為侯

宦者封侯自此始

○孝殤皇帝

太后以兄鄧騭為車騎將軍儀同三司

儀同之名見於此

○孝安皇帝

太后率大臣命婦謁宗廟

時安帝年二十猶不親祀而太后專之以命



婦陪亦創見也

### 災異策免三公

三公以災異免始于太尉徐防司空尹勤仲長統曰光武愠數世之失權忿強臣之竊命矯枉過正雖置三公事歸臺閣三公之職備員而已政有不治猶加譴責而權移外戚之家寵被近習之孺親其黨類用其私人內充京師外布列郡顛倒賢愚貿易遷舉怨氣並作陰陽失和此戚宦之臣所致然也反策讓

三公至於死免昔文帝之鄧通可謂寵愛而猶展申屠嘉之志今近世戚宦請託不行立能陷人於不測之禍惡可得而彈正哉

### 幸衛尉馮石府留飲十日

始見幸府抑何留連之久哉

### 初聽大臣二千石刺史行三年喪

三年之喪天下之通喪也漢自文帝遺詔短喪以日易月景帝遵之其後公卿大臣二千石刺史有三年喪者皆不得終制至是司徒



劉愷以為非所以師表百姓宣美風俗始詔聽之

封乳母王聖為野王君

封乳母為君始見於此

○孝順帝

初令三公尚書入奏事

三公尚書得入奏事始此

初聽中官得以養子襲爵

此後世宦者養子襲爵之始古者以閹人給

事內庭以其無男女之欲子孫之累故也今既宮之而又使之得以養子襲爵何若專用士人哉

尚書令左雄議改察舉之法限年四十以上儒者試經學文吏試章奏

限年之法始于此

武陵太守上書以蠻夷率服可比漢人增租賦其冬遂叛

漢初改黔中郡為武陵歲令大人輸布一疋



小口二丈是謂賓布今乃增租賦也  
賜宦者孫程謚

宦官亦有謚矣

蔡倫典尚方作帛用故麻名麻帛用木皮名縠  
帛用故魚網名網帛

帛始于倫視竹簡縑帛儉矣後有天閑刻藤  
之嘆可愧也已

詔舉武猛任將帥者  
後世武舉兆於此

○孝質皇帝

詔郡國舉明經詣太學受業者歲滿課試拜官  
有差

太學生課試拜官始此自是游學增盛至三  
萬餘生黨禍兆矣

○孝桓皇帝

論定策功益封梁冀萬三千戶又封其子弟皆  
為列侯

以定策功論封始見于此



初置秘書監官掌圖書秘記

秘書官名始於此即中書之任也後或省或設或曰蘭臺或曰麟臺皆此官也

以宦者單超為車騎將軍

前用授勳戚之用事者今又授宦者廼以宦者盡得文武之權噫

減百官俸

減俸始此

賣關內侯以下官

強國壽之濫至此極矣

初歛田畝稅錢

此後世歛稅之始

帝親祠老子於濯龍宮用郊天樂

後世儕老子於上帝其端肇於此

宦者使牢脩上書訟司隸校尉李膺養太學游士共為部黨下膺於獄逮捕其黨二百餘人遂策免太尉陳蕃

按朋黨之名始見於此而黨錮之禍流毒後



世矣

○孝靈帝

立選用三互法

三互謂婚姻之家及兩州人不得交互為官

置鴻都門學以處諸生之能為尺牘辭賦及工

書鳥篆者

按辭賦書篆之官肇端於此矣

作列肆于後宮帝自着商賈服從之宴飲

自是有宮中之肆矣

好私稻每郡國貢獻先輸中署名為道守行費

即今之輸納常例也流毒不遠哉

刻石鏤金載五經文于太學講堂

石經始于靈帝永光年間

造萬金堂以為私藏

宮中私藏始於此

遣使就拜張温為太尉

三公在外拜自温始

○帝協



郭汜樊稠並自開府如三公

開府之名見於此

董卓呼三臺尚書以下自詣啓事然後得行

此啓事之始也

袁紹戰罷幅巾渡河

漢末王公名士以幅巾為雅貴賤皆服之

詔遣僕射皇甫鄴和催汜催不從命

此後世人主解和臣下之始

初封曹操為費亭侯

亭侯之制自此始

古今原始第七卷下終



古今原始第八卷

桐城趙鈇鼎著

○三國

曹操募民屯田許下州郡並置田官

募民屯田始見此

以伏完為輔國將軍

輔國將軍起于獻帝

曹操以其子丕為五官中郎將為丞相副

丞相副前此未有也



益州司馬張魯據漢中以鬼道教衆

此張道陵之孫所謂五斗米賊也今世世崇尚其教而封其子孫鬼道能惑人甚矣

丹陽郡吏殺太守孫翊妻徐氏討殺之

按女子有志節始見於此

劉備三顧諸葛亮于隆中

親見處士僅見於此

漢獻帝以執金吾營劭為尚書左僕射

僕射分置左右蓋始於此

曹操因匈奴來朝留於鄴分五部散居汾晉間  
尋又徙武都氐於扶風天水

晉夷狄亂華禍成於此

曹丕始立法自今宦者官不過諸署令作策藏  
之石室

損宦官權僅見於此此可世世行也行趣不  
久何

曹丕逼帝禪位遂篡立國號魏

此後世權奸逼君禪國之始



魏武為相始遣大將軍督之而袁紹分沮授所  
統諸軍為三都督

都督之名起于此

魏主丕禁錮宗室不許朝覲通往來

禁絕宗藩始見于此

詔亮以右將軍行丞相事

行丞相事之名始見于此

鍾繇為行書法非草非真離方遁員入真者謂  
之真行帶草謂之草行

書法至此凡六變矣蔡伯喈為八分書則七

變矣

魏初制封王之庶子為卿公嗣王之庶子為卿  
侯公之庶子為亭伯

分封以漸降級始於魏然虛封不食租也

魏何晏大將軍何進孫以主壻拜駙馬都尉

此稱駙馬都尉之始也後因之初駙馬都尉

漢武置也掌御馬監兩漢多宗室及外戚與

諸公子孫任之至是為尚公主者專矣



魏置諸軍都督事

始稱都督

魏始置著作郎

漢皆以他官假著作之名今始專官隸中

書省

魏置律博士

後世非五經置博士始此

魏置度支尚書

度支始於此

魏主叡徙長安鍾簀素駝銅人承露盤于洛陽

銅人重不可致自鑄銅人二曰翁仲列坐于司

馬門外

後稱翁仲始此

魏制後嗣有由諸侯入奉大統者不得顧私親

此後之繼統之說也

魏主叡自制為烈祖廟不毀

主前豫自尊顯古所未有也

魏光祿勳高堂隆疾篤口占上疏陳戒



漢口占原于此

九月皇女亡應丞侍郎范審奏按禮喪服傳有  
死宮中者三月不舉祭不別長幼之與貴賤也  
於是使三公行事

以喪廢祭始見于此

魏司馬懿殺王凌及楚王曹彪遂置諸王公於  
鄴

後世禁錮諸王始見于此

晉置通事郎次黃門郎

通事官名始此晉改通事郎為中書侍郎

僕射曹馥沒於寇亂嫡孫胤不得葬屍招魂殯  
葬

招魂之葬始見于此

十一月長至晉行賀禮

按長至之禮不見於紀傳惟晉禮志云魏晉  
冬至日受方國及百僚稱賀因小會其儀  
於獻歲之旦志兼言魏晉不知其的在何時  
也



吳孫休即位戶部尚書讀奏

始有戶部名

晉置鮮卑降者于雍

鮮卑五胡之一也

晉胡烈討鮮卑秃髮樹機能

此南涼之先

晉選良家女備六宮禁天下嫁娶

書選女入宮始此

吳孫權使康僧求舍利既得即為造塔

此中國造塔之始也

晉初立國子學置祭酒

此國子祭酒之始

晉有尚書都令史八人秩二百石

此都事令史之始也

晉以匈奴劉淵為左部帥

匈奴晉五胡之一也其亂華始於此

作樂辭

舞與歌相應歌主聲舞主形自六代之舞



於漢魏並不著辭舞之有辭自晉始

○晉武帝

慕容涉歸寇昌黎

前燕始見於此五胡亂華鮮卑其一也不獨慕容氏如拓跋禿髮乞伏之類皆鮮卑也按昔人有言晉之亡大率中原半為夷居劉淵匈奴也而居晉陽石勒羯也而居上黨姚氏氐也而居扶風符氏也而居臨渭慕容鮮卑也而居昌黎種族日繁其居處飲食皆日

趨於華惟其桀暴貪悍樂鬪喜亂之志態則無時而可變也是以劉淵一倡而并雍之胡乘時四起自長淮之北無復晉土而為戰爭之場者幾二百年嗚呼後之人思為國家遠慮者尚為子孫豫杜絕之母謂又處中國為後患晉之事可鑒也已

除祭酒曹志等名

除名始此

陸機為浚儀令去官百姓思之圖像配食縣社



留像始此

晉武帝立皇子廟祭用大夫禮

立太子廟始此

○晉惠帝

成都王穎擊敗趙王倫兵帥師濟河左衛將軍  
王興等迎帝復位

書廢帝復位始此

晉右將軍王遐司馬劉曇父名遐求解職事詔  
不許曇解可使換官

父諱與府主同名議避始見于此

以張軌為涼州刺史

前涼始于此

巴氏李特據廣漢進攻成都

李氏據成都始于此

鮮卑宇文部圍棘城

宇文周之先兆于此

司馬顥表穎為太弟

始有太弟之名



劉淵自稱漢王

此北狄入中國稱王之始

羯胡石勒陷鄴

五胡亂華羯其一也後趙起於此

晉江統議授官與本名同及官位犯祖諱宜改

避官位始見于此

晉博士孔晁上書犯帝諱後自上又觸諱而引

詩書不諱臨文不諱有司奏以慢論帝特原之

上書避諱始見于此

冬十月匈奴劉淵僭號于蒲子國稱帝

嗚呼此夷狄稱皇帝之始夫春秋謹華夷之

辨吳楚徐越本皆華夏之諸侯也以其不循

分守僭號稱王遂一切以夷狄待之矧本夷

狄而僭吾中國之大號也哉原其始實中國

之人有以感召之也當漢明帝時無故以夢

寐恍惚之思遣遐荒絕漠之使迎胡鬼致胡

書構帝王之宮以居之屈帝王之之尊以事

之以夷召夷遂有五胡亂華之禍濫觴於北



朝之分治滔天於蒙古之混一而中國之土地人民盡為胡有矣可勝歎哉

氏酋蒲洪自稱略陽公

五胡亂華氏其一也符秦基於此

夏六月劉聰兵陷洛陽弒太子詮掘諸陵焚宮廟劉曜丞羊后晉主熾遷於平陽劉聰稱熾為光祿大夫平阿公

此中國帝王為夷狄所執之始

羌酋姚弋仲自稱扶風

五胡亂華羌其一也後秦基於此

○晉元帝

尊所生母荀氏為建安郡君

妾無並主母之禮自漢文尊薄太后後世遂嚴之以為常典胡氏謂晉明此舉可謂約情合義而能以道事親者矣

孫文上言支子不應祭刁協云諸侯奪宗聖庶奪嫡况天子乎宜加議罪

奪宗之議見此



○晉成帝

初稅田畝三升

田畝三升起科始此

納后群臣畢賀時謂非禮

此賀立后之始也

石虎始聽民為僧

此中國人為僧之始佛法自漢明帝時入中

國然漢魏時惟聽西域人立寺都邑至石虎

敬事胡僧佛圖澄國人化之始造寺廟削髮

出家則是中國之人為僧始于石虎時也

○晉明帝

中山王睦上言乞依六蓼之祀臯陶杞鄆之祀相各立廟詔從之

兄弟俱封各得立禰廟始議於此

聽民劉峻出家又聽洛陽婦女阿潘等為尼

此中國為尼之始

涼州刺史張寔遣兵入援

內援始此



殷浩罷遣太學生徒

以用兵故也學校從此廢矣

魏置僊人博士

僊人博士僅見于此又一始也

石閔改趙稱衛殺石鑒而代之國號魏

冉魏始見於此

立佛精舍于內殿

宮中事佛始此

拓跋珪復稱代王尋改稱魏

北朝基于此

慕容垂立于中山復稱燕

是為後燕

晉琅玕王妃敬后前薨而王後纂統追加謚號

改神主

改神主始見於此

柔然社崙自號可汗

此比狄稱可汗之始前此追封耳

晉道安受學於佛圖澄姓帛氏以師莫過於佛



遂以佛為姓

法門稱釋自道安始又道安見習鑿齒稱彌天釋

晉懷帝蒙塵崩於平陽梓宮未返元帝立廟之時入主太廟脩祭祀之禮

遷葬未葬入廟始見於此

晉華恒議七代制之正也若兄弟旁及禮之變也宜為神主立室不宜以室限神主今有七室而神主有十宜當別立

兄弟相繼藏主室始見議于此

晉康帝請岳與五岳同請請改議

避山川之諱始見于此

姚興命鳩摩羅什翻譯佛書大營塔寺

中國有梵夾書始盛于此嗚呼先時止有四

十一章之經藏之官寺是後雖有胡僧安靜

支懺康會等翻譯未甚傳布至姚興始大集

胡僧以華音譯番語厥後偽詐日增遂至遍

滿天下而中國虛矯者又剽竊老莊之緒餘



原如  
以粉飾之遂至摻固不可解散其尤可惡者  
竊聖經之名名之無忌憚甚已

後趙置戲馬觀觀上安詔書用五色紙啣于木  
鳳口而後頒之

今大禮御樓肆宥自石季龍始也

晉制角巾以葛為之形如帽而橫著之尊卑共  
服

葛巾始於東晉

晉今天下所在土斷

土斷欲流移附籍也其法始於晉

漢主聰立三后

立三后始此

古今事始第八卷終



卷之三



今人... 言... 而... 也

其... 三... 也

其... 故... 也



